

Statüts

Società „Miniers da S-charl“

I. General

Art. 1 Nom e sez

¹Cul nom „Miniers da S-charl“ exista üna società d’ütil public i’l sen da l’artichel 60 ss dal cudesch civil svizzer.

²Il sez da la società es a Scuol/S-charl.

Art. 2 Mera

La mera da la società es:

- a) da promover l’interess per las minieras e las fundarias veglias da S-charl e contuorns
- b) da perscrutar las perdüttanzas e da tillas documentar
- c) da mantgnair las perdüttanzas da las minieras e da las fundarias
- d) da tscherchar actas e posses privat our d’archivs e da tillas/til archivar aint il museum da minieras da S-charl
- e) da ramassar minerals e da tils expuoner aint il museum in S-charl
- f) d’organisar excursiuns in differents lös d’exploziun e d’elavuraziun; la società es legitimada da manar tras excursiuns commercialas culla società turistica
- g) da mantgnair ils interess da la società e da seis commembers invers instanzas ed invers il public e da pussibiltar l’access pro’ls implants
- h) da sustgnair las activitats da la „Fundaziun Schmelzra S-charl“
- i) d’orientar davart l’actività da la società

Art. 3 L’on da gestiun

L’on da gestiun es identic cul on da chalender.

Art. 4 Commembranza

La società cumpiglia persunas natüralas e giuridicas sco eir corporaziuns dal dret public. L’annunzcha per üna commemoranza succeda tras la suprastanza.

Art. 5 Mezs

Ils mezs finansials consistan da:

1. contribuziuns annualas dals commembers
2. rechav dad acziuns e manifestaziuns
3. contribuziuns da corporaziuns dal dret public e dad instituziuns d’ütil public
4. contribuziuns da privats.

Art. 6 Commembers d’onur

Commembers chi s’han acquistats merits specials a bön da la società pon gnir nomnats commembers d’onur. Ils commembers d’onur sun deliberats da la contribuziun.

Art. 7 Sortida

La sortida da la società po succeder sün üna finischun da l'on da gestiun da la società. Ella ha da gnir inoltrada a la suprastanza cun üna decleranza per scrit fin il plü tard als 30 november.

Art. 8 Exclusiun

Commembers chi cuntrafan als statüts o a las decisiuns dals organs da la società pon gnir exclus da la società tras la suprastanza.

Art. 9 Dovairs

Il commember es oblià da sustgnair seguond sias forzas tuot ils sforzs da la società.

Art. 10 Responsabilità

La responsabilità persunala dals commembers es esclusa. Pels impegnz da la società garantischa sulettamaing la facultà da la società.

II. Organisaziun

Art. 11 Organs

Ils organs da la società sun:

- a) La radunanza generala
- b) La suprastanza
- c) Ils revisuors da quint

A) La radunanza generala

Art. 12 Convocaziun

La radunanza generala ordinaria ha lö üna vouta l'on e quai fin il plü tard la fin da favrer. L'invid culla glista da tractandas es da comunicar per scrit als commembers fin il plü tard duos eivnas avant la radunanza generala.

Art. 13 Radunanza extraordinaria

La suprastanza po clomar per üna radunanza generala extraordinaria scha quai es i'l interess da la società. Üna radunanza generala extraordinaria sto gnir clomada, sch'almain 1/5 dals commembers pretendan quai per scrit.

Art. 14 Decisiuns ed elecziuns

¹Mincha commember singul e giuridic dispuona a la radunanza generala d'üna vusch, commembers collectivs da duos ch'els rapreschainta persunalmaing.

²La radunanza generala tira sias decisiuns ed elecziuns culla majorità simpla dals commembers preschaints. Pro parità da vuschs es la proposta sbüttada, pro elecziuns decida la bös-cha.

³Per müdamaints da statüts faja dabsögn da la majorità da duos terzs e per ün schoglimaint da la società esa necessari d'üna majorità da trais quarts dals commembers preschaints.

⁴Decisiuns ed elecziuns succedan cun votumaziun averta.

Art. 15 Cumpetenzas

¹La radunanza generala ha seguaintas cumpetenzas:

- d’acceptar ils protocols da l’ultima radunanza generala
- d’acceptar il rapport annual
- d’acceptar il quint annual e’l preventiv
- d’acceptar il program d’activitats dal prossem on da gestiun
- da fixar la contribuziun dals commembers
- d’eleger la suprastanza e’l president
- d’eleger ils revisuors da quint
- da trattar propostas, fintant chi sun gnüdas inoltradas per scrit ed in possess da la suprastanza fin la fin da december
- da reveder statüts e da schoglier la società

B) La suprastanza

Art. 16 Cumposiziun e dürada d’uffizi

¹La suprastanza as cumpuona:

- dal president
- da l’actuar
- dal chaschier
- e da duos assessuors.

Ün commember da la suprastanza vain delegà our dal ravuogl dals commembers da la „Fundaziun Schmelzra S-charl“.

²Cun excepziun dal president as constituischa la suprastanza svesa.

³La dürada d’uffizi importa duos ons.

Art. 17 Incumbenzas

¹La suprastanza as raduna uschè bler co cha’ls affars pretendan però almain duos voutas l’on. Ad ella suprastan las seguaintas cumpetenzas:

- da manar ils affars
- mutaziuns da commembers novs e da quels chi sortan
- da preparar la radunanza generala
- da publichar las actualitats e las novitats.

²Plünavant po la suprastanza

- eleger ün comitè da redacziun per ün agen organ da publicaziun o per üna partecipaziun vi d’ün simil organ
- organisar festas ed arrandschamaints.

³La suottascripziun legala per la società han il president ed ün ulteriur commember da la suprastanza.

C) Ils revisuors da quint

Art. 18 Cumposiziun

¹La radunanza generala elegia duos revisuors da quint per la dūrada da duos ons. Quels nun han dad esser commbembers da la società.

²Ils revisuors da quint examineschan il quint annual e preparan ün rapport ed üna proposta a man da la radunanza generala.

III. La collavuraziun cun otras instituziuns

Art. 19 Böt

La società cultiva üna collavuraziun stretta culla „Fundaziun Schmelzra S-charl“, culla „Società dals amis da minieras i'l Grischun“ sco eir cun otras instituziuns culs medems interess.

IV. Schoglimaint e disposiziuns finalas

Art. 20 Schoglimaint da la società

¹Il schoglimaint da la società po gnir decis be tras üna clomada d'üna radunanza generala per quel scopo.

²La facultà da la società scrouda a la „Fundaziun Schmelzra S-charl“.

Art. 21 Entrada in vigur

Quists statüts sun gnüts acceptats da la radunanza da fundaziun dals 3 october 1998 ed aintran subit in vigur.

Scuol/S-charl, als 3 october 1998

Il president: Matias Filli

L'actuar: Peder Rauch